

## Кырзась книгаос

Галина Семёнова

**Шаерысьтымы синтэмъёслы библиотека арлы быдэ ортчытья пöртэм ужрадъёс. Туэ гужем но ужаз «Дунне котыртй гужем куспын» площадка.**

Библиотекаысь калыкен ужанъя отделэн кивалтйсь Любовь Малофеева верамъя, котькуд гужем соос кыче ке темая площадка малпало. Туэ со сйземын вал Быдзым Вормонлы. Соин ик площадка ас ужзэ мытйз Ижысь суредан искусствоосъя музейын. «Мон тодйсько. Мон данъяськисько» занятын ляб адзись пинальёс тодматскизы асьме суредасьёслэн ужъёсынызы, Быдзым ожлы но Вормонлы сйзем картинаос сярись тодйзы.

Библиотекаын пöртэм конкурсьёсы, шудонъёсы пыриськем сяна, пинальёс вуылйзы Ижысь зоопарке.

- Милям тросэз лыдзисьёсмы - арлыдоос. Но берло дыре йылэ ляб адзись пинальёслэн лыдзы. Ми ужаськом сукур нылпиосын но, мукет инвалидъёсын но, кылсярысь, кылйсьтэмъёсын. Таچه пинальёсын ужаны трос тодон-валан кулэ. Специалистъёсмы талы дышетскизы. Адзисьтэм-кылйсьтэм адямиосын ужаськомы нимысьтыз программа. Президентлэн В. Путинлэн косэмезъя, таچه адямиослы юрттон вылысь Россиын кылдытэмын фонд. Со нимаське «Со-единение». Милям ужамы та фонд туж юрттэ. Покчи лыдзисьёсмы тужгес но ярато крезьгуро книгаосты (выжыкыльёсты). Библиотекае вуо аудиокнигаос но. Вань бадзым шрифтен гожтэм бичетьёс, MP3 форматэн потэм книгаос. Ляб адзись пинальёс туж сакесь, мон шуысал, соос сюлмынызы лыдзо, - шуэ Любовь Геннадьевна.

*Семенова, Г. Я. Кырзась книгаос [Текст] / Галина Семёнова // Удмурт дунне. - 2015. - 21 июля. - С. 2.*